

*Jawatankuasa Teknikal Pengurusan Darurat*

# Fokus enam kluster utama

Langkah selaras kementerian, agensi pastikan capai matlamat

**Putrajaya:** Kluster Kesihatan dan Kluster Ekonomi adalah antara enam kluster utama diberi fokus oleh kerajaan susulan penubuhan Jawatankuasa Teknikal Pengurusan Darurat, kelmarin.

Ketua Setiausaha Negara, Tan Sri Mohd Zuki Ali, berkata pembentukan enam kluster itu bertujuan menyelaras semua agensi dan kementerian terbabit dalam memastikan pengurusan darurat di seluruh negara berjalan lancar.

“Empat kluster lain adalah keselamatan, pendidikan, komunikasi dan Kluster Perhubungan Persekutuan dan Negeri,” katanya pada temu ramah eksklusif

bersama *BERNAMA* di pejabatnya di sini, semalam.

Mengulas lanjut, Mohd Zuki berkata, Kluster Ekonomi akan bertanggungjawab untuk menilai dan mengesyorkan dasar serta strategi ekonomi negara dalam tempoh darurat untuk memastikan kestabilan dan keyakinan rakyat serta pelabur.

Kluster Kesihatan, tegasnya, berperanan menilai dan mengesyorkan dasar serta strategi berkenaan kesihatan awam sepanjang tempoh darurat, merangkumi penyediaan perkhidmatan kesihatan awam yang lancar, ketersediaan bekalan ubat dan stok darah selain COVID-19 serta pengambilalihan sementara aset bagi tujuan perkhidmatan kesihatan.

Bagi Kluster Keselamatan, Mohd Zuki berkata, ia menilai dan mengesyorkan strategi keselamatan negara dalam tempoh darurat untuk mengekal, melindungi dan mempertahankan nilai teras ne-

gara termasuk akta yang perlu dikuatkuasakan sementara dan pengambilalihan sementara aset bagi tujuan keselamatan.

“Bagi Kluster Pendidikan, ia menilai dan mengesyorkan dasar dan strategi pendidikan rendah, menengah dan tertiar yang sesuai dalam tempoh darurat terutamanya membabitkan akses pendidikan, peperiksaan dan pergerakan pelajar,” katanya.

Menyentuh mengenai Kluster Komunikasi, Mohd Zuki berkata, ia akan memperjelaskan maklumat yang sahih mengenai darurat kepada rakyat, selain mengamalkan pandangan rakyat terhadap tempoh darurat.

Katanya, Kluster Perhubungan Persekutuan dan Negeri berperanan menyelaras isu perhubungan antara Kerajaan Persekutuan dan negeri, terutama dalam isu pemakaian dan penyelarasan ordinan serta enakmen negeri.

“Harus dinyatakan dalam perintah darurat ini, kerajaan ne-

geri akan berfungsi seperti biasa.

“Hanya beberapa kuasa sementara di bawah Yang di-Pertuan Agong membabitkan pengambil milikan sementara tanah bangunan atau harta alih bagi tujuan seperti dinyatakan,” katanya.

Mohd Zuki menjelaskan, semua ahli dan pihak dalam kluster itu sudah bermesyuarat dan menjalankan tugas masing-masing yang memerlukan tindakan segera bagi mengelak kesan sampingan jika tindakan lambat diambil, khasnya bagi mengawal penularan dan serta memutuskan rantai pandemik COVID19.

Dalam pada itu, katanya, jentera pentadbiran negara tidak terkesan dengan pengisytiharan darurat kerana perkhidmatan sektor terbabit termasuk awam dan swasta berjalan seperti biasa mengikut prosedur operasi standard (SOP) ditetapkan, selain mematuhi Perintah Kawalan Pergerakan (PKP).

“Apa yang mustahak, perkhid-



**Mohd Zuki Ali**

matan kerajaan tidak terjejas. Ini penting untuk dimaklumkan kepada rakyat dan pelabur agar mereka faham mesej yang hendak disampaikan termasuk kenapa darurat diperkenalkan.

“Walaupun PKP sudah wujud, kes masih tinggi kerana itu penting rakyat memahami dan mematuhi Ordinan Darurat yang diumumkan supaya pelaksanaannya dapat dijalankan sebaik mungkin,” katanya.

Kelmarin, Perdana Menteri, Tan Sri Muhyiddin Yassin mengumumkan kerajaan bersetuju menubuhkan sebuah Jawatankuasa Teknikal Pengurusan Darurat, bagi memastikan pengurusan darurat di seluruh negara berjalan lancar.

BERNAMA